



Chiara Jacomet cun sia band probabel per l'emprima giada a la staziun da Turitg.

FOTOS M. HARTMANN

Cun scharm grischun talian e rumantsch

Lia Rumantscha e Pro Grigioni Italiano communabel cunter No-Billag a Turitg

■ (anr/ac) Da reacziuns ordvart positiv han ils divers exponents rumantschs e da las valladas grischunas da lingua taliana relatà ier a la staziun principala da Turitg. Els han contactà durant l'entir di passants a la staziun ed fatg attent a las consequenzas da No-Billag per las minoritads grischunas. Il Bergagliot *Jon Bischoff* porta ina giacca da pumpiers e reparta en la staziun da Turitg zutgers e flyers. El ha pledentà ier passants a la staziun e fatg attent a las consequenzas da l'iniziativa No-Billag per las minoritads linguistics dal chantun Grischun ed intimà da vuschar na a l'iniziativa en votaziun ils 4 da mars. El ha discurrì da bleras e bunas reacziuns davart da passantas e passants sin l'acziun iniziada da la Lia Rumantscha e da la Pro Grigioni Italiano. «Ina persuna ha schizunt ditg ch'ella voteschia aposta per la Ruman-

tschia e la Italianità grischuna cunter l'iniziativa». Da resuns positivs han er *Alea Berther* e *Gianna Beeli* pudì raquintar. Ellas èn medemamain stadas activas cun flyers e zutgers ed han dà pled e fatg davart ils basegns rumantschs e lur medias. Reacziuns negativas èn stadas en la minoritad. Sulet singulas personas hajan refusà il dialog, han ditg ils exponents rumantschs e da lingua taliana. L'acziun a la staziun da Turitg è vegnida enramada da diversas preschentaziuns musicalas e curts plects.

Scuntrada rumantscha

Sa participà a l'acziun da la part rumantscha e taliana dal chantun Grischun è era il minister da cultura grischun, cusseglier guvernativ *Martin Jäger*. El ha discurrì dad ina situaziun extraordinaria ch'in commember da la regenza grischuna sa participeschia ad ina manife-

staziun a la staziun da Turitg. Jäger ha argumentà sia preschientscha cun l'impurtanza da la votaziun dals 4 da mars per il chantun Grischun. Normalmain saja la regenza grischuna fitg reservada pertutgant votaziuns federalas. Quella giada saja la regenza sa posiziunada gia baud. Il cusseglier guvernativ ha fatg attent a la trilinguitad grischuna che saja dependenta da medias intactas. Ed ellas sajan dependentas da taxas da radio e televisiun. Las medias grischunas ed en general en la muntogna sajan periclitadas entras l'iniziativa No-Billag, ha ditg Jäger a la staziun da Turitg. S'exprimi è tranter auter er il secretari general da la Lia Rumantscha, *Martin Gabriel*. El ha menziunà la dumbraziun actuala da Rumantschas e Rumantschs ed accentuà l'impurtanza da las medias per la promozziun da la lingua e cultura rumantscha.



Pascal Gamboni ha delectà il publicum a la staziun da Turitg.



Il cusseglier guvernativ *Martin Jäger* ha represchentà la regenza grischuna ed ha entupà la deputada *Silvia Casutt*.



Represchentants da la cultura grischuna rumantscha: *Gieri Maissen*, *Mario Pacchioli* e *Paulin Nuotclà* (da san.).



Flavia Hobi, *Viola Pfeiffer* e *Benedetto Vigne* èn da buna luna.



Ils pumpiers *Flurin Bundi* (a san.) e *Jon Bischoff* èn adina là nua ch'i brischa.